

ССВ: Рамазон ҳайити ва қўшимча дам олиш кунларида тиббиёт муассасалари тун-у кун ишлайди



12:23 / 01.05.2022 1260

Президентнинг тегишли қарорига кўра, Рамазон ҳайити байрами муносабати билан 5 май санасига қадар кетма-кет дам олиш кунлари белгиланди.

ССВ матбуот хизмати бу даврда халқ хотиржамлиги ҳамда саломатлигини таъминлаш — ўта муҳим масала эканини қайд этди.

Шундан келиб чиққан ҳолда, Соғлиқни сақлаш вазирлигида байрам ва қўшимча ишланмайдиган кунларда мамлакатдаги тиббиёт муассасалари фаолиятини мувофиқлаштириб бориш мақсадида штаб ташкил этилди.

Байрам ва қўшимча дам олиш кунларида қуйидаги даволаш-профилактика муассасаларида 40 минг нафар тиббиёт тизими ходими қонунда белгиланган тартибда, навбатчилик асосида аҳолига хизмат кўрсатади:

1010 та оилавий поликлиника,

858 та оилавий шифокор пункти,

туман, вилоят ва республика миқёсидаги барча шифохоналар,

ихтисослаштирилган тиббиёт марказлари,

тиббиёт олий ўқув юртлари клиникалари.

Шунингдек:

Республика шошилиш тиббий ёрдам илмий маркази, унинг ҳудудлардаги 13 та филиали ҳамда 180 та аҳоли пунктида жойлашган субфилиалларида 24 соат давомида навбатчи шифокор ва ҳамширалар фаолият юритади. Ушбу муассасалар зарур дори-дармонлар билан таъминланиб, захира ўринлари яратилган.

Мамлакат бўйлаб 2700 га яқин тез тиббий ёрдам бригадаси аҳолидан бўладиган чақириқлар учун доимо шай ҳолатда.

Бундан ташқари, 218 та туғуруқ, 238 та болалар даволаш муассасалари ҳам узлуксиз иш олиб боради.

Санитария-эпидемиология хизматининг марказий аппарати ва ҳудудлардаги 14 та бошқарма ҳамда 203 та аҳоли пунктида жойлашган бўлимларида ҳам 24 соат давомида 200 нафардан зиёд навбатчи шифокор, қарийб 200 нафарга яқин врач-лаборант ва ёрдамчи ходимлар ўз фаолиятини давом эттиради.

Соғлиқни сақлаш вазирлиги байрам ва дам олиш кунларида узлуксиз меҳнат қиладиган барча тиббиёт ходимларига ўз миннатдорлигини билдиради.